

Na osnovu člana 11. b) odjeljka A, poglavlja V i člana 3. c) i h) poglavlja IV Ustava Unsko-sanskog kantona – Prečišćeni tekst („Službeni glasnik Unsko-sanskog kantona“, br.: 1/04, 11/04), Skupština Unsko-sanskog kantona, na _____ sjednici, održanoj dana _____, donosi

ZAKON O VODAMA -Nacrt-

POGLAVLJE I. OSNOVNE ODREDBE

Član 1.

Predmet Zakona

(1) Ovim Zakonom uređuje se način upravljanja vodama, vodnim dobrima i vodnim objektima na području Unsko-sanskog kantona (u daljnjem tekstu: Kanton) koji su prema federalnom Zakonu o vodama („Službene novine Federacije Bosne i Hercegovine“, br. 70/06), (u daljem tekstu: Federalni zakon) u nadležnosti Kantona.

(2) Upravljanje vodama obuhvata: zaštitu voda, korištenje voda, zaštitu od štetnog djelovanja voda i uređenje vodotoka i drugih voda.

(3) Ovim Zakonom uređuju se: vlasništvo nad vodnim dobrima i vodnim objektima, nadležnosti, ovlaštenja i obaveze Kantona, općina, pravnih lica i građana u upravljanju vodnim dobrima i vodnim objektima na području Kantona, obaveze Kantona, općina i pravnih lica u uspostavi, upravljanju i održavanju informacionog sistema voda na području Kantona, podjela nadležnosti između Kantona i općina u izdavanju vodnih akata, finansiranje upravljanja vodama, vodnim dobrima i vodnim objektima u nadležnosti Kantona i općina, organizacija upravnog i inspeksijskog nadzora, kao i druga pitanja od značaja za upravljanje vodnim dobrima i vodnim objektima na području Kantona.

Član 2.

Svrha Zakona

Svrha ovog Zakona je osiguranje upravljanja vodama s ciljem:

- a) smanjenja zagađenja voda, postizanja dobrog stanja voda i sprečavanja degradacije voda;
- b) postizanja održivog korištenja voda;
- c) osiguranja pravičnog pristupa vodama;
- d) poticanja društvenog i privrednog razvoja;
- e) zaštite ekosistema;
- f) smanjenja rizika od poplava i drugih negativnih uticaja voda;
- g) osiguranja učešća javnosti u donošenju odluka koje se odnose na vode;
- h) sprečavanja i rješavanja sukoba vezanih za zaštitu i korištenje voda.

POGLAVLJE II. OSNOVNA NAČELA I DEFINICIJE

Član 3.

Opća načela

(1) Vode su opće dobro i kao takve su pod posebnom zaštitom Federacije Bosne i Hercegovine, Kantona i općine.

(2) Osnovna načela na kojima se zasniva upravljanje vodama na području Kantona su načela određena odredbama člana 3. stav 2. Federalnog zakona.

Član 4. Definicije

Izrazi upotrebljeni u ovom Zakonu imaju isto značenje kao što imaju izrazi navedeni u odredbama člana 4. Federalnog zakona.

POGLAVLJE III. VLASNIŠTVO NAD VODNIM DOBRIMA I VODNIM OBJEKTIMA

Član 5. Površinske vode i vodno dobro

- (1) Površinske vode i vodno dobro koje tretira ovaj Zakon su površinske vode i vodno dobro koji su Federalnim zakonom svrstani u vode II kategorije i vodno dobro uz te vode.
- (2) Kantonalno Ministarstvo poljoprivrede, vodoprivrede i šumarstva (u daljem tekstu: Kantonalno ministarstvo) utvrđuje granicu pojedinačnog vodnog dobra za površinske vode II kategorije, u skladu sa odredbama člana 8. Federalnog zakona.
- (3) Granica vodnog dobra iz stava 2. ovog člana upisuje se u zemljišni katastar.

Član 6. Javno vodno dobro

- (1) Javno vodno dobro za površinske vode II kategorije čine površinske vode i vodno dobro iz člana 5. ovog Zakona koje su do dana stupanja na snagu Federalnog zakona bile upisane u zemljišnim knjigama kao javno dobro, državno vlasništvo ili vlasništvo općine, odnosno koje su na osnovu zakona postale državno vlasništvo.
- (2) Javno vodno dobro definirano u stavu 1. ovog člana je dobro od općeg interesa.

Član 7. Vlasništvo nad javnim vodnim dobrom

Javno vodno dobro za sve površinske vode II kategorije je u vlasništvu općine na čijoj se teritoriji nalazi.

Član 8. Vodni objekti

- (1) Vodni objekti su objekti ili skupovi objekata koji, zajedno sa pripadajućim uređajima, čine tehničku, odnosno tehnološku cjelinu i služe za zaštitu od štetnog djelovanja voda, zahvatanje voda radi njihovog namjenskog korištenja i zaštitu voda od zagađivanja.
- (2) Vrste vodnih objekata utvrđene su odredbama člana 14. Federalnog zakona.

Član 9. Vodni objekti u vlasništvu Kantona

U vlasništvu Kantona su slijedeći vodni objekti koji su izgrađeni državnim sredstvima:
a) objekti za odvodnjavanje, osnovna i detaljna odvodna kanalska mreža, crpne stanice za odvodnjavanje i drugi pripadajući objekti;

b) objekti za iskorištavanje voda za:

- 1) snabdijevanje vodom privrednih subjekata - brane i akumulacije, vodozahvati, bunari, kaptaze sa odgovarajućom opremom, cjevovodi i drugi pripadajući objekti,
- 2) navodnjavanje - brane i akumulacije, dovodni kanali i tuneli, vodozahvatne građevine, crpne stanice, ustave, dovodna i razvodna mreža i drugi pripadajući objekti,
- 3) ostale namjene - objekti za uzgoj riba, rekreacioni bazeni, jezera i dr.;

Član 10.

Vodni objekti u vlasništvu općine

U vlasništvu općine su slijedeći vodni objekti:

a) zaštitni objekti koji pripadaju površinskim vodama II kategorije - nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane sa akumulacijama, ustave, retenzije, crpne stanice za odbranu od poplava i drugi pripadajući objekti, kao i objekti za zaštitu od erozija i bujica;

b) uređena korita u urbanim područjima na površinskim vodama I kategorije;

c) objekti za iskorištavanje voda za:

- 1) vodosnabdijevanje (izuzev za opću upotrebu voda) - brane i akumulacije, vodozahvati, bunari, kaptaze sa odgovarajućom opremom, postrojenja za prečišćavanje vode za piće, rezervoari, cjevovodi i drugi pripadajući objekti;
- 2) Objekti za zaštitu voda od zagađivanja (u daljnjem tekstu: vodni objekti za zaštitu voda) - kolektori za prijem i transport otpadnih voda, postrojenja za prečišćavanje otpadnih voda, ispusti u prijemnik i drugi pripadajući objekti i oprema.

POGLAVLJE IV. UPRAVLJANJE VODAMA

Član 11.

Upravljanje vodama

- (1) Upravljanje vodama čini skup odluka, aktivnosti i radnji čija je svrha održavanje, poboljšanje i ostvarivanje potrebnog i održivog vodnog režima na određenom prostoru u skladu sa prirodnim uslovima, planovima, potrebama i mogućnostima.
- (2) Upravljanje vodama na području Kantona je u nadležnosti Federacije Bosne i Hercegovine, Kantona i općina, na način utvrđen Federalnim i ovim Zakonom.
- (3) Općine upravljaju javnim vodnim dobrom iz člana 7. ovog Zakona i vodnim objektima iz člana 10. ovog Zakona.
- (4) Kanton upravlja vodnim objektima iz člana 9. ovog Zakona.

Član 12.

Ciljevi upravljanje vodama

Upravljanje vodama iz člana 11. ovog Zakona ostvaruje se naročito obezbjeđenjem potrebnih količina voda odgovarajućeg kvaliteta za različite namjene, zaštitom voda od onečišćavanja, planiranjem i kontrolom svih aktivnosti i procesa u upravljanju vodama, monitoringom, obrazovanjem i edukacijom u vezi svih aktivnosti i radnji u upravljanju vodama.

Član 13.
Teritorijalne osnove upravljanja vodama

- (1) Osnovna teritorijalna jedinica za upravljanje vodama je vodno područje.
- (2) Područje Kantona u cjelini pripada Vodnom području rijeke Save u skladu sa članom 23. stav 3. Federalnog zakona.

Član 14.
Politika upravljanja vodama

Kanton i općine dužni su sprovoditi politiku upravljanja vodama utvrđenu Federalnom Strategijom upravljanja vodama.

Član 15.
Usklađenost sa planom upravljanja vodnog područja

- (1) Programi uređenja i održavanja vodotoka i drugih voda i programi izgradnje, rekonstrukcije i održavanja vodnih objekata koje donosi općina moraju biti u skladu sa Planom upravljanja vodama za Vodno područje Save i Programom mjera koji je dio tog plana.
- (2) Programi iz stava 1. ovog člana koje donosi općina usklađuju se i sa programima uređenja gradskog građevinskog zemljišta, programima obavljanja komunalnih djelatnosti zajedničke komunalne potrošnje i dokumentima prostornog uređenja, koje takođe donosi općina.

POGLAVLJE V. KORIŠTENJE VODA

Član 16.
Snabdijevanje vodom za piće

Korištenje voda u svrhu snabdijevanja vodom za piće regulisaće se kantonalnim propisom o komunalnim djelatnostima i općinskom odlukom u skladu sa tim propisom.

Član 17.
Zahvatanje vode sa područja jedne općine za potrebe snabdijevanja vodom na području druge općine

- (1) Rješavanje pitanja snabdijevanja vodom za piće, kada lokalna izvorišta ne mogu da zadovolje potrebe za vodom sadašnjih i budućih generacija, vrši se zahvatanjem vode sa područja jedne općine za potrebe snabdijevanja vodom na području druge općine.
- (2) Odluku o zahvatanju vode u skladu sa stavom 1. ovog člana donosi Kantonalno ministarstvo, na osnovu prethodno izrađene studije opravdanosti i izvodljivosti.
- 3) Zahvatanje vode ne može biti osnov za postavljanje odštetnih zahtjeva od strane općine, sa čijeg se područja zahvata voda za potrebe druge općine, jer je korištenje voda za piće, kao općeg dobra, jednako pravo svih građana i pravnih lica na području Kantona.

POGLAVLJE VI. ZAŠTITA VODA

Član 18.

Odvodnja i prečišćavanje otpadnih voda

- (1) Odluku o odvodnji i prečišćavanju otpadnih voda na području općine donosi općinsko vijeće na osnovu odredbama člana 54. stav 3. Federalnog zakona.
- (2) Odluka iz stava 1. ovog člana sadrži naročito: odredbe o načinu odvodnje otpadnih voda, obavezu priključenja na javni kanalizacioni sistem, uvjete i način ispuštanja otpadnih voda na područjima na kojima nije izgrađen javni kanalizacioni sistem, obavezu posebnog odlaganja i odstranjivanja opasnih i drugih materija, te obavezu održavanja javnih kanalizacionih sistema.
- (3) U slučaju da se istim javnim kanalizacionim sistemom odvodi otpadna voda sa područja više općina odluku donosi Vlada Kantona.

Član 19.

Zaštita izvorišta vode za piće

- (1) Zone sanitarne zaštite i zaštitne mjere utvrđuje općinski organ uprave nadležan za vode na čijem se području nalazi izvorište.
- (2) Odluku o zaštiti izvorišta vode za piće čije se zone sanitarne zaštite prostiru na području jedne općine donosi nadležno općinsko vijeće u skladu sa odredbama člana 68. stav 2. Federalnog zakona.
- (3) Odluka iz stava 2. ovog člana sadrži naročito: granice zona sanitarne zaštite, sanitarne i druge uvjete u pojedinim zonama i druge mjere zaštite, zabrane i ograničenja, izvore i načine finansiranja za provođenje zaštitnih mjera, nazive organa i pravnih lica koji će provoditi odluku, te kazne za povredu odredba te odluke.
- (4) Odluku o zaštiti izvorišta vode za piće čije se zone sanitarne zaštite prostiru na području više općina u sastavu Kantona, donosi Vlada Kantona na prijedlog Kantonalnog ministarstva.
- (5) Odluke o zaštiti izvorišta vode za piće iz stava 2. i 4. ovog člana donose se u skladu sa propisom iz člana 66. stav 3. Federalnog zakona.

POGLAVLJE VII. ZAŠTITA OD ŠTETNOG DJELOVANJA VODA

Član 20.

Zaštita od štetnog djelovanja voda

- (1) Pod zaštitom od štetnog djelovanja voda podrazumijeva se provođenje aktivnosti i mjera u cilju smanjenja ili sprečavanja ugroženosti ljudi i materijalnih dobara od štetnog djelovanja voda i otklanjanje posljedica njihovog djelovanja.
- (2) Zaštita od štetnog djelovanja voda odnosi se na odbranu od poplava i leda na vodotocima i zaštitu od erozije i bujica.
- (3) Pored zaštite iz stava 2. ovog člana, zaštita od štetnog djelovanja voda obuhvata i mjere zaštite i otklanjanje posljedica prouzrokovanih vanrednim zagađenjem voda.

Član 21.

Obaveze nadležnih nivoa vlasti

- (1) U cilju zaštite od štetnog djelovanja voda, Kanton i općine na ugroženom području osiguravaju, svako u okviru svoje nadležnosti prema odredbama Federalnog i ovog Zakona, planiranje mjera zaštite, gradnju i upravljanje zaštitnim vodnim objektima, a naročito gradnju

nasipa, brana, pregrada, objekata za stabilizaciju dna i obala, objekata za odvođenje unutrašnjih voda i dr.

(2) Obim zaštite od štetnog djelovanja voda i potrebne mjere utvrđuju se slijedećim planovima:

- a) Posebnim planovima zaštite od poplava i leda;
- b) Planovima zaštite od erozije i bujica i
- c) Planovima zaštite od vanrednog zagađenja voda.

(3) Planove iz stava 2. ovog člana za površinske vode II kategorije donose Skupština Kantona i općinsko vijeće, svako u okviru svoje nadležnosti, prema odredbama Federalnog i ovog Zakona.

(4) Planove iz stava 2. ovog člana općinsko vijeće donosi uz prethodnu saglasnost Kantonalnog ministarstva.

Član 22.

Aktivna odbrana od poplava

(1) Za vrijeme neposredne opasnosti od pojave velikih (poplavnih) voda Kanton i općina osiguravaju, svako u okviru svoje nadležnosti prema odredbama Federalnog i ovog Zakona, provođenje mjera aktivne odbrane od poplava.

(2) Ministar Kantonalnog ministarstva, na osnovu odredaba iz člana 92. stav 5. Federalnog zakona, donosi plan o mjerama aktivne odbrane od poplava i načinu njihovog provođenja za područja uz površinske vode II kategorije na području Kantona.

Član 23.

Usklađenost planova zaštite od štetnog djelovanja vode

(1) Planovi iz člana 21. stav 2. i člana 22. stav 2. ovog Zakona moraju biti usklađeni sa odgovarajućim planovima zaštite od štetnog djelovanja vode za područja uz površinske vode I kategorije na području Kantona.

(2) Planovi iz člana 21. stav 2. koje donosi općinsko vijeće moraju biti međusobno usklađeni između susjednih općina, kao i sa planovima iz navedene odredbe koje donosi Skupština Kantona.

(3) Planovi iz člana 21. stav 2. i člana 22. stav 2. ovog Zakona moraju biti usklađeni sa Kantonalnim i općinskim programima razvoja zaštite od prirodnih i drugih nesreća i planovima zaštite od prirodnih i drugih nesreća, koji se donose na osnovu odredaba Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ br. 39/03 i 22/06).

Član 24.

Sanacija posljedica štetnog djelovanja voda

(1) Sanacija posljedica štetnog djelovanja voda izvodi se na osnovu programa sanacije.

(2) Ako su posljedice štetnog djelovanja vode nastale na javnom vodnom dobru iz člana 7. ovog Zakona i na vodnim objektima iz člana 10. ovog Zakona, sredstva za njihovu sanaciju osigurava općina.

(3) Ako su posljedice štetnog djelovanja voda nastale na vodnim objektima iz člana 9. ovog Zakona, sredstva za njihovu sanaciju osigurava Kanton.

(4) Ako su posljedice štetnog djelovanja vode nastale na vodnom objektu ili uređaju koji nisu u vlasništvu općine, odnosno Kantona, njihovu sanaciju dužan je osigurati vlasnik.

(5) Program sanacije iz stava 1. ovog člana predlaže Kantonalno ministarstvo, odnosno

općinski organ uprave nadležan za vode, a donosi Vlada Kantona, odnosno općinski načelnik u roku od 6 mjeseci od dana procjene štete i pripreme prijedloga programa sanacije.

(6) Procjenu štete i pripremu prijedloga programa sanacije vrši posebna komisija za procjenu štete, u skladu sa Federalnim i ovim Zakonom i Zakonom o zaštiti i spašavanju ljudi i materijalnih dobara od prirodnih i drugih nesreća.

POGLAVLJE VIII. UREĐENJE I ODRŽAVANJE VODNIH DOBARA I VODNIH OBJEKATA

Član 25.

Obaveze općine

(1) Općina osigurava uređenje površinskih voda i vodnih dobara iz člana 5. ovog Zakona.

(2) Općina osigurava izgradnju, rekonstrukciju i održavanje vodnih objekata iz člana 10. ovog Zakona.

Član 26.

Način realizacije obaveza općine

(1) Uređenje i održavanje površinskih voda i vodnih dobara iz člana 5. ovog Zakona općina osigurava kroz donošenje i realizaciju programa uređenja i održavanja površinskih voda i vodnih dobara.

(2) Izgradnju, rekonstrukciju i održavanje vodnih objekata iz člana 10. ovog Zakona općina osigurava kroz donošenje i realizaciju programa izgradnje, rekonstrukcije i održavanja vodnih objekata.

(3) Za pojedine djelatnosti iz oblasti voda, koje su prema odredbama Kantonalnog Zakona o komunalnim djelatnostima ujedno i komunalne djelatnosti individualne odnosno zajedničke komunalne potrošnje, određene radnje i aktivnosti na uređenju i održavanju površinskih voda i vodnih dobara, odnosno izgradnji, rekonstrukciji i održavanju vodnih objekata mogu se osigurati u okviru općinskih programa uređenja gradskog građevinskog zemljišta, programa izgradnje objekata i uređaja komunalne infrastrukture i programa obavljanja komunalnih djelatnosti zajedničke komunalne potrošnje.

Član 27.

Vrste i rokovi donošenja programa

(1) Programi iz člana 26. ovog Zakona se dijele na višegodišnje i godišnje.

(2) Višegodišnji programi donose se za period od najmanje 3 godine.

(3) Prve višegodišnje programe općine će donijeti do kraja 2010. godine.

(4) Godišnji programi donose se za svaku kalendarsku godinu, najkasnije do kraja tekuće godine za narednu godinu.

Član 28.

Ostale obaveze općine

(1) U izvršavanju obaveza iz člana 25. ovog Zakona općina je obavezna poduzimati ekološki prihvatljive mjere koje su prikladne za održavanje ili ponovno uspostavljanje dobrog stanja površinskih voda.

(2) Općina je dužna da obezbijedi i sredstva za pravilno održavanje korita i obala vodotoka u naseljenim mjestima i korištenje u skladu sa njihovom prirodom i namjenom, kao i čuvanje

korita i obala vodotoka od uništenja ili oštećenja, odnosno nenamjenskog korištenja (odlaganje otpada, ispaša stoke, korištenje u poljoprivredne svrhe i sl.).

(3) Općina je dužna da iz vodotoka i sa vodnog dobra otklanja sve vrste komunalnog i drugog otpada.

Član 29. Obaveze Kantona

Kanton osigurava izgradnju, rekonstrukciju i održavanje vodnih objekata iz člana 9. ovog Zakona.

Član 30. Način realizacije obaveza Kantona

Izgradnju, rekonstrukciju i održavanje vodnih objekata iz člana 9. ovog Zakona Kanton osigurava kroz donošenje i realizaciju godišnjih planova i programa Kantonalnog ministarstva.

Član 31. Obaveze vlasnika zemljišta uz vodno dobro

Vlasnici, odnosno posjednici zemljišta uz javno vodno dobro dužni su održavati priobalni pojas, odnosno vodno dobro u širini svog zemljišta, uključujući i otklanjanje komunalnog otpada.

POGLAVLJE IX. INFORMACIONI SISTEM VODA

Član 32. Uspostava kantonalnog informacionog sistema voda

(1) U cilju optimalnog prikupljanja, korištenja i povezivanja osnovnih baza podataka koje čine osnovu za upravljanje vodama na području Kantona uspostavlja se kantonalni informacioni sistem voda (u daljem tekstu : KISV).

(2) KISV iz stava 1. ovog člana je ujedno dio, odnosno podrška Informacionom sistemu vodnog područja Save.

Član 33.

Ciljevi uspostave KISV

(1) Opći ciljevi uspostave KISV su:

a) Racionalizacija, integracija i optimizacija odlučivanja, analiza i planiranja u sektoru voda na području Kantona kroz primjene geografskih informacionih sistema, baza podataka i komunikacione tehnologije.

b) Razmjena i objedinjavanje informacija, interno-unutar sektora voda, između općina, Kantona i federalnih institucija i eksterno- sa vanjskim institucijama (civilna zaštita, vatrogasci, policija i dr.)

(2) Posebni ciljevi uspostave KISV su:

a) Posebni ciljevi sadržani u članu 98. stav 2. tačka 1.-7. Federalnog zakona;

b) Povećanje kvaliteta usluge organa uprave i uslužnih preduzeća iz oblasti voda prema korisnicima usluga-građanima i pravnim licima.

Član 34. Sadržaj KISV

- (1) KISV sadrži baze podataka i podatke koji su Federalnim zakonom određeni za ISV na nivou vodnih područja i druge podatke od interesa za upravljanje vodama na području Kantona.
- (2) KISV, prema odredbama ovog Zakona sadrži tri osnovne grupe podataka i to:
 - a) Dvije osnovne grupe u skladu sa odredbama člana 99. federalnog Zakona;
 - b) Treću osnovnu grupu podataka koja se odnosi na podatke u nadležnosti preduzeća (javnih i drugih komunalnih preduzeća koja obavljaju određene djelatnosti iz oblasti voda).
- (3) Osnovne grupe podataka iz stava 2. tačke 2. ovog člana čine:
 - a) Katastar vodovodnih, kanalizacionih i drugih instalacija, objekata i uređaja;
 - b) Podatke o kvaliteti vode za piće vodovodnih sistema;
 - c) Katastar i druge podatke kolektora, objekata i uređaja za odvodnju otpadnih, oborinskih i industrijskih-tehnoloških voda.

Član 35. Vodni katastar

- (1) Vodni katastar čine katastri i podaci određeni odredbama člana 100. Federalnog zakona.
- (2) Kantonalni i općinski organi i institucije, kao i druga fizička i pravna lica koja vode određene podatke koji spadaju u vodni katastar dostavljaju KISV dužni su istaknuti period ažuriranja vremenski promjenljivih podataka.

Član 36. Vodna knjiga

- (1) Vodna knjiga sadrži podatke određene odredbama člana 101. stav 1. i 2. Federalnog zakona.
- (2) Vodnu knjigu vode kantonalni i općinski organi uprave nadležni za izdavanje vodnih akata.
- (3) Vodna knjiga se vodi unutar baze podataka, radi povezivanja sa prostornim podacima unutar vodnog katastra, evidencijama izdatih koncesija, evidencijama inspekcijskih pregleda i ostalim podacima od interesa za upravljanje vodama.

Član 37. Evidencija inspekcijskih pregleda

- (1) Kanton i općina održavaju, svako za vodnu inspekciju za koju su nadležni, podatke o inspekcijskim pregledima unutar elektronske baze podataka.
- (2) Vodna inspekcija dužna je dostaviti kopiju predmeta o inspekcijskom pregledu nadležnom organu za vođenje podataka radi evidentiranja.

Član 38. Organizacija i upravljanje KISV

- (1) U cilju optimalnog prikupljanja, korištenja i povezivanja osnovnih grupa podataka koji čine osnovu za upravljanje vodama na području Kantona, KISV se uspostavlja za površinske vode II kategorije.
- (2) Za uspostavu i upravljanje KISV, u dijelu koji se odnosi na grupe podataka određene

odredbama člana člana 98. do člana 106. Federalnog zakona primjenjuje se propis iz člana 104. stav 3. Federalnog zakona.

(3) Za uspostavu i upravljanje KISV, u dijelu koji se odnosi na grupe podataka od interesa za upravljanje vodama na području Kantona, koji nisu sadržani u propisu iz stava 2. ovog člana, propis će donijeti Ministar Kantonalnog ministarstva .

(4) Kantonalno ministarstvo organizira, uspostavlja i upravlja KISV.

(5) Općina je dužna uspostaviti baze podataka i podatke dostavljati Kantonalnom ministarstvu u skladu sa propisima iz stava 2. i 3. ovog člana, odnosno po zahtjevu Kantonalnog ministarstva.

POGLAVLJE X. VODNI AKTI

Član 39.

Vrste vodnih akata

(1) Radi osiguranja upravljanja vodama i osiguranja pravičnog pristupa vodi svim pravnim i fizičkim licima, odredbama člana 107. stav 1. Federalnog zakona propisani su vodni akti, i to:

- a) Prethodna vodna saglasnost,
- b) Vodna saglasnost i
- c) Vodna dozvola.

(2) Vodni akti iz stava 1. ovog člana su upravni akti i izdaju se u formi rješenja.

(3) Postupak izdavanja vodnih akata provodi se prema pravilima utvrđenim Federalnim zakonom, uz supsidijarnu primjenu Zakona o upravnom postupku („Službene novine Federacije BiH“ br. 2/98, i 48/99).

4) U postupku izdavanja vodnih akata primjenjuje se odredbe Pravilnika o sadržaju, obliku, uslovima, načinu izdavanja i čuvanja vodnih akata („Sl. novine Federacije BiH broj: 6/08, 57/09 i 72/09).

Član 40.

Podjela nadležnosti izdavanja vodnih akata

(1) Kantonalno ministarstvo je nadležno za izdavanje vodnih akata za:

- a) Izgradnju hidroelektrana za proizvodnju električne energije, kada je postrojenje locirano na površinskim vodama II kategorije, snage do 5 MW;
- b) Formiranje akumulacije koja je locirana na površinskim vodama II kategorije i nalazi se na području kantona;
- c) Izgradnju regionalnih saobraćajnica.

(2) Općinski organ uprave nadležan za vode nadležan je za izdavanje vodnih akata za:

- a) Zahvatanje vode u količini do 10 litara u sekundi;
- b) Ispuštanje otpadnih voda za naselja koja imaju do 2.000 stanovnika;
- c) Vađenje materijala iz površinskih voda II kategorije;
- d) Izgradnja objekata za zaštitu od poplava na površinskim vodama II kategorije, ako te aktivnosti ne utječu na površinske vode I kategorije;
- e) Izgradnju lokalnih saobraćajnica uključujući i šumske puteve;
- f) Ispuštanje otpadnih voda pojedinačnih objekata koje se vrši putem septičkih jama;
- g) Izgradnju mostova, prelaza, propusta ili drugih objekata iznad ili u površinskim vodama II kategorije;
- h) Uređenje vodotoka na površinskim vodama II kategorije.

(3) Za izdavanje vodnih akata za ostale aktivnosti sadržane u članu 109. Federalnog zakona, na osnovu člana 139. stav 1. Federalnog zakona, nadležna je Agencija za vodno područje rijeke Save.

Član 41.

Nadležnosti za postupanje po žalbi na izdate vodne akte

Protiv rješenja Kantonalnog ministarstva, odnosno općinskog organa uprave nadležnog za vode o izdatom vodnom aktu iz člana 39., a u vezi sa članom 40. ovog Zakona donesenog u prvostepenom postupku, shodno članu 181. stav 3. Federalnog zakona, žalba se izjavljuje Federalnom ministarstvu poljoprivrede, vodoprivrede i šumarstva (u daljem tekstu: Federalno ministarstvo).

POGLAVLJE XI. OGRANIČENJA PRAVA VLASNIŠTVA KORISNIKA ZEMLJIŠTA

Član 42.

Ograničenja prava vlasnika i korisnika zemljišta

Na vlasnike i korisnike zemljišta primjenjuju se ograničenja prava utvrđena odredbama člana 140.-151. Federalnog zakona.

Član 43.

Zabrana mijenjanja pravca i količine voda na štetu susjednog zemljišta

(1) Vlasnik, odnosno korisnik zemljišta ne može na štetu susjednih zemljišta mijenjati pravac ili količinu vode koja prirodno otiče preko ili kroz njegovo zemljište.

(2) Vlasnik, odnosno korisnik zemljišta koji učini radnju iz stava 1. ovog člana dužan je o svom trošku vratiti u prijašnje stanje pravac i količinu vode koju je preusmjerio na štetu susjednog zemljišta.

POGLAVLJE XII. ORGANIZACIJA UPRAVLJANJA VODAMA

Član 44.

Upravljanje vodama na kantonalnom nivou

(1) Upravljanje vodama na Kantonalnom nivou ostvaruje se preko Kantonalnog ministarstva.

(2) Zadatak Kantonalnog ministarstva je da obezbijedi uslove za trajno i nesmetano obavljanje poslova kojima se ostvaruje upravljanje vodama na Kantonalnom nivou, na način i u obimu utvrđenim planskim dokumentima koji se donose na osnovu Federalnog i ovog Zakona.

Član 45.

Zadaci Kantonalnog ministarstva

Poslovi i zadaci Kantonalnog ministarstva kojima se obezbjeđuju uslovi za upravljanje vodama na Kantonalnom nivou su:

- a) Izvršavanje i obezbjeđenje izvršavanja Zakona, drugih propisa i općih akata iz oblasti voda;
- b) Provođenje politike upravljanja vodama određenom strategijom upravljanja vodama na području Federacije BiH;
- c) Učestvovanje u pripremi i izradi planskih dokumenata iz oblasti voda na nivou vodnog

područja Save, Kantona i općina;

d) Izrada i praćenje realizacije godišnjih planova i programa Kantonalnog ministarstva;

e) Obezbjedenje pravilne raspodjele sredstava vodnih naknada, koji se u skladu sa ovim Zakonom ustupaju općinama;

f) Kontrola namjenskog korištenja ustupljenih sredstava vodnih naknada od strane općina;

g) Izdavanje vodnih akata koji su Federalnim i ovim Zakonom dati u nadležnost Kantonalnog ministarstva;

h) Uspostavljanje, održavanje i upravljanje sa KISV;

i) Saradnja sa Agencijom za vodno područje Save i općinama Kantona vezano za upravljanje vodama na području Kantona;

j) Izrada propisa i drugih akata iz oblasti voda u nadležnosti Kantona;

k) Vršenje upravnog i stručnog nadzora nad obavljanjem poslova i zadataka vezanih za upravljanje vodama;

l) Vršenje drugih poslova i zadataka koji su Federalnim i ovim Zakonom dati u nadležnost Kantona.

Član 46.

Upravljanje vodama na općinskom nivou

(1) Upravljanje vodama na općinskom nivou ostvaruje se preko općinskog organa uprave nadležnog za vode.

(2) Zadatak općinskog organa uprave nadležnog za vode je da obezbijedi uslove za trajno i nesmetano obavljanje poslova i zadataka kojima se ostvaruje upravljanje vodama na općinskom nivou na način i u obimu utvrđenim Federalnim i ovim Zakonom i planskim dokumentima koji se donose na osnovu tih Zakona.

Član 47.

Zadaci općinskog organa uprave nadležnog za vode

(1) Poslovi i zadaci općinskog organa uprave nadležnog za vode kojima se obezbjeđuju uslovi za upravljanje vodama na općinskom nivou su:

a) Izvršavanje i obezbjeđenje izvršavanja Zakona, drugih propisa i općih akata iz oblasti voda;

b) Provođenje politike upravljanja vodama određenom Strategijom upravljanja vodama na području Federacije BiH;

c) Izrada propisa i drugih akata iz oblasti voda koje donosi općinsko vijeće i općinski načelnik;

d) Priprema i izrada planskih dokumenata iz oblasti voda utvrđenim ovim Zakonom;

e) Obezbjedenje realizacije planskih dokumenata iz oblasti voda;

f) Izdavanje vodnih akata koji su ovim Zakonom dati u nadležnost općini;

g) Uspostavljanje i održavanje baza podataka od interesa za KISV;

h) Praćenje stanja i kretanja u oblasti voda na području općine;

i) Saradnja sa Agencijom za vodno područje Save, Kantonalnim ministarstvom i drugim općinskim organima uprave vezano za poslove upravljanja vodama na području općine;

j) Vršenje stručnog nadzora nad radom pravnih subjekata kojima je općina povjerila obavljanje pojedinih djelatnosti, odnosno određenih poslova i zadataka iz oblasti voda;

k) Vršenje upravnog i stručnog nadzora nad radom pravnih subjekata kojima općina povjeri vršenje određenih upravnih i stručnih poslova iz nadležnosti općine u oblasti voda;

l) Vršenje drugih upravnih i stručnih poslova vezanih za upravljanje vodama na općinskom nivou koji su Federalnim i ovim Zakonom dati u nadležnost općine.

(2) Općina može pojedine stručno-tehničke poslove vezano za upravljanje vodnim dobrima i

vodnim objektima iz njene nadležnosti povjeriti određenom pravnom licu ili u tu svrhu osnovati javno preduzeće.

Član 48.

Obezbjeđenje uslova za upravljanje vodama na općinskom nivou

- (1) Općina je dužna da obezbijedi materijalne, organizacione i druge uslove za održavanje vodnih dobara i vodnih objekata iz svoje nadležnosti u funkcionalnom stanju i njihovo korištenje u skladu sa njihovom prirodom i namjenom, kao i čuvanje od uništenja, oštećenja i nenamjenskog korištenja.
- (2) Općinsko vijeće donosi odluku kojom reguliše način korištenja i druga pitanja od značaja za održavanje i čuvanje vodnih dobara i vodnih objekata iz svoje nadležnosti.

POGLAVLJE XIII. FINANCIRANJE UPRAVLJANJA VODAMA

Član 49.

Izvori sredstava

Sredstva za obavljanje poslova i zadataka određenih ovim Zakonom osiguravaju se iz:

- a) dijela opće vodne naknade i posebnih vodnih naknada koje u skladu sa članom 177. stav 1. tačka 2. FZoV pripadaju kantonu;
- b) prihoda po osnovu zakupa javnog dobra;
- c) budžeta Kantona;
- d) budžeta općina;
- e) sredstava osiguranih posebnim zakonima (naknada za uređenje gradskog građevinskog zemljišta, komunalna naknada i dr.);
- f) kreditnih sredstava;
- g) donacija;
- h) sredstava pravnih lica i građana;
- i) ostalih sredstava u skladu sa zakonom.

Član 50.

Raspodjela sredstava između Kantona i općina

- (1) Sredstva vodnih naknada i prihoda prikupljenih na osnovu zakupa javnog vodnog dobra, koja po odredbama člana 177. stav 1. tačka 2. i stav 2. Federalnog zakona pripadaju budžetu Kantona, raspodjeljuju se na slijedeći način:
 - a) u korist budžeta Kantona 33 %
 - b) u korist budžeta općina 67 %
- (2) Sredstva iz stava 1. tačka b. ovog člana raspoređuju se pojedinim općinama u procentu iz stava 1. tačka b. u odnosu na ostvarene prihode na području te općine.
- (3) Prenos sredstava iz stava 1. tačka b. ovog člana sa budžeta Kantona na budžet općina vrši se najmanje jedanput u toku sedmice.
- (4) Sredstva iz stava 1. tačka b. ovog člana općine mogu koristiti samo za realizaciju zadataka koji su odredbama ovog Zakona dati u nadležnost općini, a za namjene utvrđene članom 178. Federalnog Zakona.
- (5) Kontrolu namjenskog korištenja sredstava od strane općina vrši Kantonalno ministarstvo.

Član 51.
Princip supsidijarnosti

(1) Sredstva iz člana 50. stav 1. ovog Zakona koja su raspoređena u korist budžeta Kantona, pored za namjene i zadatke iz člana 178. federalnog Zakona, koriste se za sufinansiranje kapitalnih projekata iz oblasti voda u općinama koje nemaju dovoljno svojih sredstava za finansiranje tih projekata .

(2) Korištenje sredstava iz stava 1. ovog člana vrši se na osnovu propisa o kriterijima i načinu korištenja sredstava iz stava 1. ovog člana koji donosi Ministar Kantonalnog ministarstva.

Član 52.
Korištenje sredstava za finansiranje upravljanja vodama

(1) Sredstva iz člana 49. ovog Zakona koja se formiraju na nivou općina koriste se za finansiranje programa i planova iz člana 21. i člana 26. ovog Zakona.

(2) Sredstva iz člana 49. ovog Zakona koja se formiraju na nivou Kantona koriste se za finansiranje planova iz člana 22. i člana 30. ovog Zakona, a raspoređuju se u budžetu Kantona u razdjelu Kantonalnog ministarstva.

POGLAVLJE XIV. UPRAVNI NADZOR NAD PROVOĐENJEM OVOG ZAKONA

Član 53.
Upravni nadzor

Kantonalno ministarstvo vrši upravni nadzor nad provođenjem ovog Zakona i propisa donesenih na osnovu ovog Zakona, kao i upravni nadzor nad radom općinskih organa uprave nadležnih za vode u obavljanju poslova koji su ovim Zakonom dati u nadležnost općinama.

Član 54.
Postupanje Kantonalnog ministarstva u vršenju upravnog nadzora

(1) U vršenju nadzora nad obavljanjem poslova koji su ovim Zakonom dati u nadležnost općine, Kantonalno ministarstvo ostvaruje neposredan uvid i kontrolu u postupanje općinskih organa uprave nadležnih za vode, vrši pregled akata i dokumentacije koju donose općinski organi i o kojoj vode evidenciju, daje naloge i instrukcije za obavljanje poslova i traži podatke i obavještenja o izvršavanju obaveza iz ovog Zakona i drugih propisa donesenih na osnovu ovog Zakona i izvještaje o izvršavanju zadataka općina propisanih ovim Zakonom.

(2) Ako Kantonalno ministarstvo utvrdi da općina ne izvršava obaveze iz ovog Zakona i propisa donesenih na osnovu ovog Zakona koje su u njenoj nadležnosti, ili opće akte za čije izvršenje je ovlaštena, ili utvrdi nepravilnosti u radu općinskih organa, određuje rok u kojem se obaveze iz ovog Zakona, propis ili opći akt moraju izvršiti, odnosno nepravilnosti otkloniti.

(3) Ako općina u roku ne izvrši obavezu koja joj je naložena prema odredbama stava 2. ovog člana, Kantonalno ministarstvo će o utvrđenom propustu ili nepravilnosti obavijestiti Vladu Kantona.

(4) U slučaju iz stava 3. ovog člana Vlada Kantona izdaje smjernice općinskom organu uprave nadležnom za vode, odnosno preduzima mjere kojima se osigurava obavljanje poslova na način utvrđen ovim Zakonom.

Član 55.
Inspekcijski nadzor

- (1) Inspekcijski nadzor nad provođenjem ovog Zakona i propisa donesenih na osnovu ovog Zakona vrše općinska i kantonalna vodna inspekcija.
- (2) Inspekcijski nadzor nad provođenjem ovog Zakona i propisa donesenih na osnovu ovog Zakona koji su ovim Zakonom stavljeni u nadležnost Kantona, provodi kantonalna vodna inspekcija organizirana u Kantonalnoj upravi za inspekcijske poslove.
- (3) Inspekcijski nadzor nad vršenjem poslova koji su ovim Zakonom stavljeni u nadležnost općine, provodi općinska vodna inspekcija.
- (4) U obavljanju poslova inspekcijskog nadzora kantonalna i općinska vodna inspekcija postupaju u skladu sa odredbama člana od 186. do 197. federalnog Zakona.

Član 56.
Ovlaštenja inspektora

- (1) Kantonalni vodni inspektor, prema ovom Zakonu, ovlašten je i dužan da:
 - a) spriječi neovlašteno korištenje vode, u smislu odredaba ovog Zakona;
 - b) spriječi ili ograniči ostvarivanje prava na korištenje vode, ako se ona ne koriste u skladu sa vodnom dozvolom, u skladu sa odredbom člana 40. stav (1);
 - c) obustavi izgradnju ili izvođenje zahvata u prostoru, ako se ta izgradnja i zahvati izvode bez ili u suprotnosti sa vodnom saglasnosti;
 - d) odredi privremeni prekid obavljanja djelatnosti, ako se krše odredbe dozvole iz tačke b) stav (1) ovog člana;
 - e) zabrani upotrebu objekta i uređaja, ako se koriste bez ili u suprotnosti sa vodnom dozvolom, u skladu sa odredbom člana 40. stav (1);
 - f) zabrani ili ograniči ispuštanje otpadnih voda u površinske vode ili indirektno ispuštanje otpadnih voda u podzemne vode, ako se to ispuštanje vrši u suprotnosti sa odredbama člana 55. federalnog Zakona i odrediti uspostavljanje prvobitnog stanja;
 - g) zabrani vađenje materijala iz površinskih voda, ako se vađenje tog materijala vrši bez vodnog ili u suprotnosti sa vodnim aktima;
 - h) odredi obavezu vraćanja u prvobitno stanje i obavezu utvrđivanja štete i naknade štete nastale radnjama iz tačke g) stav (1) ovog člana;
 - i) odredi i druge mjere u skladu sa ovim Zakonom, ili na osnovu propisa i vodnih akata donesenih na osnovu ovog Zakona.
- (2) Općinski vodni inspektor, prema ovom Zakonu, ovlašten je i dužan da:
 - a) spriječi neovlašteno korištenje vode, u smislu odredaba ovog Zakona;
 - b) spriječi ili ograniči ostvarivanje prava na korištenje vode, ako se ona ne koriste u skladu sa vodnom dozvolom, u skladu sa odredbom člana 40. stav (2);
 - c) obustavi izgradnju ili izvođenje zahvata u prostoru, ako se ta izgradnja i zahvati izvode bez ili u suprotnosti sa vodnom saglasnosti;
 - d) odredi privremeni prekid obavljanja djelatnosti, ako se krše odredbe dozvole iz tačke b) stav (2) ovog člana;
 - e) zabrani upotrebu objekta i uređaja, ako se koriste bez ili u suprotnosti sa vodnom dozvolom, u skladu sa odredbom člana 40. stav (2);
 - f) odredi i druge mjere u skladu sa ovim Zakonom, ili na osnovu propisa i vodnih akata donesenih na osnovu ovog Zakona.

Član 57.
Odnos kantonalne i općinske vodne inspekcije

Ako kantonalna vodna inspekcija utvrdi da općinski vodni inspektor ne sprovodi odredbe Federalnog i ovog Zakona koje se odnose na inspeksijski nadzor iz njegove nadležnosti, pisanim putem će zatražiti od općinskog organa nadležnog za vodnu inspekciju da bez odlaganja preduzme zakonom utvrđene mjere i aktivnosti.

Član 58.
Žalbe na rješenje vodnog inspektora

- (1) Žalbu na rješenje općinskog vodnog inspektora donesenog na osnovu ovog Zakona i propisa donesenih na osnovu ovog Zakona, u drugom stepenu rješava kantonalni vodni inspektor, a žalba se podnosi putem općinske vodne inspekcije.
- (2) Žalbu na rješenje općinskog vodnog inspektora donesenog na osnovu općinskih propisa, u drugom stepenu rješava općinski organ uprave određen propisom općine.
- (3) Žalbu na rješenje kantonalnog vodnog inspektora donesenog na osnovu ovog Zakona i propisa donesenih na osnovu ovog Zakona, u drugom stepenu rješava Kantonalno ministarstvo.

POGLAVLJE XV. KAZNENE ODREDBE

Član 59.
Prekršaji

- (1) Novčanom kaznom u iznosu od 3.000,00 KM do 10.000,00 KM kazniće se za prekršaj pravno lice ako:
 - a) Ne održava vodno dobro u skladu sa odredbama člana 31. ovog Zakona;
 - b) Postupa suprotno odredbama člana 43. stav 1. ovog Zakona;
 - c) Ne preduzme mjere u skladu sa odredbama člana 43. stav 2. ovog Zakona.
- (2) Za prekršaj iz stava 1. ovog člana kazniće se i odgovorno lice u pravnom licu novčanom kaznom u iznosu od 500,00 KM.
- (3) Za prekršaj iz stava 1. ovog člana kazniće se i fizičko lice novčanom kaznom u iznosu od 200,00 KM do 1.000,00 KM.
- (4) Za prekršaj iz stava 1. ovog člana kazniće se i odgovorna osoba u kantonalnom i općinskom organu nadležnom za vode novčanom kaznom u iznosu od 500,00 KM.

Član 60.

- (1) Novčanom kaznom u iznosu od 1.500,00 KM do 7.500,00 KM kazniće se za prekršaj pravno lice ako ne postupa u skladu sa odredbama člana 35. stav 2. ovog Zakona.
- (2) Za prekršaj iz stava 1. ovog člana kazniće se i odgovorno lice u pravnom licu novčanom kaznom u iznosu od 200,00 KM do 1.000,00 KM.

POGLAVLJE XVI. PRELAZNE I ZAVRŠNE ODREDBE

Član 61. Planski dokumenti

Do donošenja Strategije upravljanja vodama na području Federacije BiH i Plana upravljanja vodama za vodno područje Save, kao planski dokumenti za upravljanje vodama u Kantonu, odnosno općinama, koristit će se odgovarajući planovi i programi razvoja vodoprivrede i pojedinih oblasti vodoprivrede (zaštita od štetnog djelovanja voda, zaštita voda i korištenje voda), doneseni do dana stupanja na snagu ovog Zakona.

Član 62. Ranije izdati vodni akti

- (1) Vodne dozvole koje su izdate do dana stupanja na snagu ovog Zakona, usaglasit će se sa odredbama ovog Zakona u roku od pet godina od dana stupanja na snagu ovog Zakona.
- (2) Vodne saglasnosti koje su izdate do dana stupanja na snagu ovog Zakona, uskladiti će se sa odredbama ovog Zakona u postupku izdavanja vodnih dozvola.
- (3) Prethodne vodne saglasnosti koje su izdate do dana stupanja na snagu ovog Zakona, uskladit će se sa odredbama ovog Zakona u postupku izdavanja vodne saglasnosti.
- (4) Nosioци prava iz vodnog akta iz stava 1. ovog člana dužni su podnijeti zahtjev za njegovo preispitivanje u roku od dvije godine od dana stupanja na snagu ovog Zakona.
- (5) U slučaju da zahtjev iz stava 4. ovog člana nije podnesen u roku iz stava 4. ovog člana, vodni akt iz stava 1. ovog člana prestaje da važi.
- (6) Odredbe iz stava 1. ovog člana ne odnose se na vodne dozvole koje važe pet godina ili manje od dana stupanja na snagu ovog Zakona.

Član 63. Neriješeni zahtjevi za izdavanje vodnih akata

Zahtjevi za izdavanje vodnih akata koji su podneseni nadležnom organu prije stupanja na snagu ovog Zakona rješavat će se u skladu sa odredbama Zakona o vodama („Službene novine Federacije BiH“ broj: 70/06) i propisima donesenih na osnovu tog Zakona.

Član 64. Postupci po žalbama

Postupci po žalbama koje nisu riješene do dana stupanja na snagu ovog Zakona rješavat će se u skladu sa Zakonom o vodama („Službene novine Federacije BiH“ broj 70/06) i propisima donesenim na osnovu tog Zakona.

Član 65. Rokovi za donošenje propisa Ministra Kantonalnog ministarstva

Propise za provođenje ovog Zakona iz člana 38. stav 3. i člana 51. stav 2. ovog Zakona Ministar Kantonalnog ministarstva donijet će u roku od šest mjeseci od dana stupanja na snagu ovog Zakona.

Član 66.

Rokovi za uspostavu KISV i općinskih baza podataka

- (1) KISV iz člana 32. stav 1. ovog Zakona Kantonalno ministarstvo će uspostaviti u roku od jedne godine od dana stupanja na snagu ovog Zakona.
- (2) Baze podataka iz člana 38. stav 5. Zakona općine će uspostaviti u roku od jedne godine od dana stupanja na snagu ovog Zakona.

Član 67.

Rokovi za donošenje kantonalnih i općinskih planova

- (1) Planove iz člana 21. stav 2. ovog Zakona Kanton će donijeti u roku od jedne godine od dana stupanja na snagu ovog Zakona.
- (2) Planove iz člana 21. stav 2. ovog Zakona općine će donijeti u roku od jedne godine od dana stupanja na snagu ovog Zakona.

Član 68.

Rokovi za donošenje općinskih odluka

Općinske odluke iz člana 18. stav 1., člana 19. stav 2., i člana 48. stav 2. ovog Zakona donijet će se u roku od jedne godine od dana stupanja na snagu ovog Zakona.

Član 69.

Usklađivanje postojećih općinskih odluka

Postojeće općinske odluke iz člana 68. ovog Zakona i druge općinske odluke iz oblasti voda uskladit će se sa odredbama ovog Zakona od šest mjeseci od dana stupanja na snagu ovog Zakona.

Član 70.

Stupanje na snagu

Ovaj Zakon stupa na snagu osmog dana od dana objavljivanja u „Službenom glasniku Unsko-Sanskog Kantona“.